



**Verhalen  
in het dialect 8**

**Martin Wichink**

Veurwoord.

As heel jong is Martin Wichink begunn met ut schriem van verhaalen.

Ut gaf hem de meugelijkheid um tiedens ut schrijven zich terugge te trekken in zien eigen deur letters en woorden gevisualiseerde wereld.

Disse “verzameling verhaalen” is un bundeling “ongesleppen” emoties uut ut dagelijkse laeven, vormmegeem in verhalen en gedichten van disse prieswinnende auteur.

Disse prachtige saamgestelde bundel van Martin’s meest toonaangeemde teksten, geeft de laezer un verfrissende unieke kiek op de wereld.

Disse verhaalen is ut achtste verzamelingsbundel welke op disse maniere in openbaarheid kump en is ontstaone uut zijn passie veur schriem.

Martin Wichink.

Inhoud van disse verzameling verhalen:

### **Un terugblik van...**

Un terugblik van mien rieke voetballeaven met al zien hoogte en diepte punten.

### **Ut kan stormen in Nederland.**

Dat ut hard kan wei'jen in Nederland, wet wie weh. Ma wat ze noe weer bedacht hebt, leas ie hier.

### **Veer joargetieden.**

Ut zol ma zo kun wenne dat Vivaldi hier in Hoarle was, toen hij zien beroemde stuk bedacht hef.

### **Vremd volk achter thuus.**

As der ineens fremd volk achter oen huus verschijnt, wuj doar natuurlek weh meer van wetten.

### **Windstille.**

Hier un verhaal wat un windstille dag met un stadsmense kan doene.

Völle wille weer bie ut leazen van de verhalen.

## **Un trugblik van 'n old voetballer.**

Ik beginne biet begin, dus bie de jeugt. (deel ééne)

Op de lèègere skoele in de éérste klasse ist begun.

Meester Weijkamp vreug geliek an de jongs, oj weh ééense dag han um te goan voetball'n. Veur un ander woj'ut nie weten, dus ging ie der bie.

Kleere en skoene koj haaln bie Gaitie vant Erve in de wèènkkel. Kreej gin korting, dan kreej weh un penne of snùùpies.

A snel haj un elftal veur de Effies bie mekaare. Met zien allen loop'n wie al snel op'n kloet'n. Meester Weijkamp hat dan ok een joar de tied um oons uut mekaare te kriegn.

Noa det joar kwam ut eerste klapstuk. De vereeniging bestunt viemtvingt joar. Alle jeugdtiens môggen toen tingt èèrste voetball'n. Wie hebt toen nog met vèèrdrèèje wúnn en det hek nie e'dreumt.

Ok bint wie met òønse leiders noar Go Ahet e'wes. Ut gaf niks daw doar mössen stoan. Noe kon wie better lóage flessies zùùk'n veur wat statiegeld. Wie wissen veur ut thuisfròònd weh, dat Ajax doar kwaamp voetball'n. De uutslag bink vergetten deur alle hektiek.

Doarnoar bin'k over'e goane noa de Eetjes. Trèèn deew opt laant van Roettering.

Doar kwam mien tallent as verdeedeger na veuren. Alleen as kieper, doar waak nie eg geschikt veur.

Buuten de teeng goals umme, hef mie det ok nog un gekneusde pols oppelévèrt. Moar doar bik noe weh weer van geneez'n.

Bie de Deetjes ging wie veurt eerst nát groote veld. Det was mie toch un nènde loop'n van de èène noar'n de andere kàànte. De leiders kon'n ma nie begriep'n, daw soms te mùù wààn'n um terugge te kom'n. Doar muj tog ok èèrs an wén'n.

A ging ut posietsiespel nie himmoa good, tog begreep'n wie weh hoe ut möss.

Van de Ceetjes week nie meer zovölle van. Det is dan waarschiynluk ok gin hoogtepunt e'wes.

Van de Beetjes week nog, dak un keer bie A èène mösse invall'n. Det was má van korte duur. Was net kòlt ut veld innegoane met wissel'n en hat nog gin bal annerààkt. Opt moment dak veur de èèrsen balle ginge, krèèk un schup van tèengstander op de bùùtenkàànte van mien enkel. Det dèèt zo gloepens zeer, dak mie gin

moment bedagge. Ik dreajn mie úmme en hààln zonder noa te denk'n ùùt. Toen bink ut veld al weer ùùte stuurt. De scheits hat ut volgens mie nie himmoa goed e'zèene.

Doarna ging wie noar A twèè toe. Noa un belabbet joar kon wie nie verder zakk'n. Gelukkig haw nog weh un voetbaltoernooj in Hoarle. Wie mössen ting de Hoarlese kampioen A èène. Ut ging bes weh zwoar, mar tog heuln wie stànt.

Toen Hans van Knobb'n Harm de balle ùùt schòòt, kónne nie begriepen dat Gaitie Tijs um in een keer op de sloffe kon ném. Un fraaie boogballe kreege dan ok direkt terugge. Over ziene haane hen en onder de latte deur.

Ut was weh bááln veur A èène, want wie ging der met de beker vandeur.

Int vólnde deel vertel ik miene gebeurteniss'n, hoe't was bie de groot'n.

Dan kom'mie bie de groot'n voetball'n. (deel twéé). Int veurige deel hek ut hat oaver miene gebeurteniss'n bie de jeugt.

Umdat de seleksie nog nie bekend is veur iederèene, kriej kààns umis wat hooger te goan voetball'n.

Twee wedstried'n môg ik met doen int vèerde. Det was dan ok geliek mien hoogtepunt op det nievoo, doarnoa bik nog nooit weer zo hooge kúm.

Int vijfde kwaam'ik toen tregte. Doarna bik alleen ma iets vedder e'zakt.

Wie ging ok weh ééns op de fietse noa Nijverdalen toe um te voetball'n. Dan waan wie al mùù, veur daw begún wààn en det köss'n òòns hoogùùt drèè punt'n. Met bier drink'n wún wie dan weh weer noa de tied.

Ok bin wie un wiekent weg e'wes. Ut was een soort trèeningskààmp. Ik geleuve nie daw doar un wedstried wún e'hebt of ut was in de derde helfte.

De diskoteek in die plààse was soams gelieke vol, toen wie met de vroale der bie, doar binn'n kwààm.

Veur dat wie de voll'n dag terug noar huus woll'n, ging wie eers nog etten bie de sjienees. Doar hef Henk van keupsie e'leert, dat de loempiaas doar grooter wààn dan bie Gé van de Knobbe. Deurumme hatte der ok mä drie bestelt. Hej hef zig nie loat'n kenn'n en hef alle gruunte oppe'getten. Ak ut verhaal'n mag geleum, maj bliej wén daj nie doarnoa bie in de auto zààt'n.

Twee keer bink ok in èèn elftal drèè vénte tèègn e'kom van Hoek Jan, an de Almeloose weg. Det was nie zo apát, want doar han ze bienoa un elftal thuus. Zie han doar zelfs un keeper, Henkie is de nààme. Den kan mie wáskijnlúk nog gòòt herrin'den... dén k ik. In èèn wedstriet met de korners ném, hek twee keer de balle weggekopt oaver de achterliene. De derde keer hek de kornen der zelf mar inne kopt, a was ut weh an de vekèèrde kàànte. Weh was de balle onholtbaar veur elke kieper, dus ok veur Henkie.

Wie bint ok un keer met Gaitie Tijs met trekker en wààg'n noar Luttenbárg e'wes.

Op de trugweg mössen wie al tenk'n. De trekker dèèt nog weh, mar wie hán döss. Bie de schoenmaaker lén wie an en drunk'n de doar èèrs ok nog un pààr. Toe ging der ok nog un pààr kratt'n bier met op de wààg'n veur onderweg. Wie wààn bliekbaar zón biezondere verschijning, dat ze mùùjte han um òòns in te hààln. Wat der nog oaver was van't bier toew oaver wààn, môg Gaitie met nêem. Mô det was nie zóó völle meer.

Tog hek met hèèl wat grootheden (úút Hoarle en úmstrèèkn) e'spélt. Un paar hek der nog zo inspireerd,



dat ze't skupt hebt tut ut èèrste. Noe kank ze aamoa wel opnùùm, moar dan hej ut bùùkie zo vol.

Ok hek biezondere leiders met e'mààkt. De een was un vark'nboer en de aander deut wat met gierténks. Tog hek altied respekt e'hat, wat zie allemoal mössen rèègeln. A vun ik ut nie leuk ak een halfe wedstriet an de kàànte mösse stoan. Mâ iederèène kreeg ziene beurte. Net as met ut schoonmààk'n van de kleeckààmes.

De leste joaren kreew minder wasse. Spòònsering kwààmp ump de hoek kiek'n. Eers van ut gròòtsen kafèè ùùt Hoarle, doarnoa stun wie der saam geknipt op met zien all'n. De sjienees deet ok nog met. Wie bint doar met potvertèèrn ok nog un keer e'wes. Kon wie metèène de kleinn bekieken, wán den was net un paar wekke olt. Det hef òòns nog un rúntie oppelévèrt biet etten. Nie dat òòns det zoo völle ùùte mààk'n, wánt de wiekentveurroad is toch wel oppe'goane. Uut vatsoen bint wie toen má over e'goane op flessies. Zo toon ie een bettie respect veur de sponser... toch? Wie kreg der dan ok achtien man oaver de vloere met kroamsküdd'n op zundagmiddag.

Op'n vesierde wàng achter un trekker of auto's met vlagg'n deur Hoarle hen, det hek nooit met e'mààkt. Det kûmp waarskijnlûk umdak nooit in un kampioenselftal hebbe zett'n. Toch hek weh best völle hoogtepunten met e'mak, woarvan ik der hier un paar van hebbe loat'n zien. Meskien hek hier ààn'den doar weh met inspireert. Die nödig ik dan ok ùùt um ok eens wat te skriem. Doar kan de jeugt miskien nog wat van e'lèèr'n.

## Ut kan stormen in Nederland.

Dat ut kan stormen in Nederland, det wet wie weh. Zie bint noe net as in ut buutenlaand ok begun om stormen un naame te geem. Ut is van doar oaver kommen wei'jen, zak ma zeng.

Noe kuj doar luchtig oaver doene, want ut meeste weit weh weg. Ma as un storm noe koode oranje of rood kreg, dan muj oppassen.

Alles wat weg kan wei'jen, muj vaste zetten of opbargen. Nie alleene veur oezelf, ma ook veur un aander. Zo hoal ie de schade klein. Noe bint der aaltied luu, die doar veurdeel in ziet. Dan krieg ie ok is wat nie'js. A kunt doar ok haaken en ogen an zitten en dan he'k ut nie oaver un dekzeil.

Vief van die stormen heb wie noe al e'had. Wat ik nog nie wus, is dat ze a begint te tellen vanof september. Atiyah, Brendan, Ciara, Dennis en Ellen hebt wie noe e'had. Weh vaake in ut wiekend en det is ma goed ok. Dan is iedereene bienoa bie huus en dan kuj ok gelieke de rommel weer opruumen, ok a is ut nie van oezelf. Dan is der ok minder verkeer op de weg en det schelt a weer bie ongelukken. Kapbeleid wut em an de kaante scheam en dan wut der nie op un beumpie meer of minder e'kekken. Det is soms ma goed ok. Ie zoln der

ma eene op oene auto of huus kriegn. Dan ma em iets minder gruun bezig wenne. Det kump weh weer. Met natsiejonaale beumendag kunt wie zo de schaa weer rechtzetten, as ut op den dag natuurlek niet te had weit.

As wie noe nog neegn stormen kriegt, dan is ok miene naame un feit. As storm Piet wut ik dan e'nuumd. Det past dan weh un bettie bie mie. Bin un boom van un kjal, wei'je met völle winden met en stekke miene haane graag uut de mouwen. Doarnoast bin ik ok nog un luchtig persoon. Zo zie'j ma weer dat de naamkeuze zo gek nog nie is. Wanneer ie noe an de beurte bint, det wet ik nie. Zie hebt mie ok niks e'vroagn of Piet goed was. Doe doar ok gewoon luchtig oaver en blieve met de beide beene op de grond stoane. Noe ma hoppen dat ut allemoal un bettie mag oaverwei'jen. Hoal oezelf goed vaste.

## **Veer joargetieden.**

Vivaldi hat ut a vrog deur. De veer joargetieden, watte verwarkt hef in ziene muziek. Ie mut der ok oog veur hem.

Ak zelf ik richting ut bos loope oaver de Mölnweg noar de pas toe, dan mag ik geerne oaver ut weiland noar de beume kieken. Dan kuj de veer joargetieden heel mooj in ziene.

's Winters bievueurbeeld, bint de beume kaal. Ma as ut giet vriezen, dan hij der aaltied zo mooj wit loagie der oaverhen zitten. Rijp nuumt ze det. Net of ut bos in bluu'j stiet in de winter. Dan zie'j doar ok völle foto's op sosiesjaale media stoane.

Int veurjoar zie'j de toppen eers gruun wun, net veurdat de knoppen zich loat zien. De sappen van de boom stroomt dan weer deur de aaderen, zak ma zeng. Dan weet ie dat ut veurjoar der an kump. Noe muj mie nie direkt op un wekke vaste spiekeren, want de natuur loat zich tog nie dwingn.

Tussendeur kunt wie in met nog genieten van de roodoodendrons die dan in bluu'j stoat. Bie ut

heksenhuusie hej dan ok de azaalie'jaas in bluu'j stoane. Een pracht gezicht.

Zommers vink de beume ok mooj, as noa un troopiesche reagnbuuje ut stof weer van de blaaderen is offe'spuult. As dan em laater ok nog is ut zunnegie der oaverhen skient, dan blinkt alles mooj alsof ut net skoone maakt is.

In augustus is dan tied veur de bluu'jende heide op de koningsbelten. Eene peerse gloed waj dan ziet.

In de harfst ist tied um oe kloar te maaken veur de winter. Völle dieren hamstert wat ze kunt veur de wintersloap. Wie mag genieten van de prachtige kleurnpracht. Veural in ut begin zie'j ut gruun zich vermengen met de gekleurde blaaderen. Der verkleurt der steeds meer in de loop der tied. Soms lek ut weh of der gold blinkt. Ma ie kunt oe alleene ma rieke rekken met ut beeld waj ziet.

Zo zie'j ma weer, Vivaldi had hier ok ziene muziek kun skriem. Hoarle is zo gek nog nie. Wie hebt meer in huus dat meenigeen denkt.

Zie der vaste noe weh meer em stoan wachen bie den bosraand. Geniet der van luu, tis en blef un mooj gezichte. Aans zie'k oe vaste nog weh un keer aans lopen. Völle wille.

## **Vremd volk achter thuus.**

Zoo... det is brutaal. Twee vremde vogels bint zo ma bie oons achter in de tuin. Zie kiekt um zig hen en dan kek ut wiefie deur de openstoande deure van ut kleine oale huusie na binnen toe. Ut mannegie blef op de uutkiek, as ut wiefie em laater ok nog is na binnen hen giet. Ik besluute nog em te wachen, want ting die twee is toch muulik op te boksen. Met niks kump ut wiefie weer deur de deure na buut'n toe. Lange duurt ut nie veurdats ze ineens vot bint.

De voln'de dag bint ze der a weer. Ut huusroad wut na binnen e'slept. Ie wult niet wetten wat doar allemoal na binnen wut e'brach. Zo wut det tuinhuisie ineens onverkloarbaar bewoont. Ut wiefie blef thuus um ut huusie veur mekaare te maaken. Ut mannegie is hard ant wark. As al det holt nog meubels mut wun, dan zol alle bouwbedriem in Hoarle tesaam der jaloers op wun.

Ok de catering muj nie uutvlakken. Wat veur etten doar de laatste wekken na binnen wut e'brach. Den wiefie kump straks noojt meer deur die deure hen. Ma zol den de nog weh in zitten. Meskien is'ter weh wat gebeurt,



datte ut heel muulik hef. Dat ut mannegie deurumme zovölle etten doar hen brengt.

Better un goeje buur dan un verre vriend, zeg ze dan tog. Dus trek ik miene stoute skoene an en goa na buuten toe. Meteene giet er un allarm of. Den mannegie fluit schel un ofgesprökken kode en probeert mie of te leiden. Det loat ik mie zo nie gebeuren, dus loope na ut huusie toe. Ut gefluit wut arger en dut hoaste zeer an miene oorn. Ak deur de open deure na binnen wil loern, dan zie ik niks, ma binnen heur ik weh gepiep. Dus ut wiefie hef visite. Hep aans gin vremd volk doar na binnen zien goane. Vremd, heel vremd. Ut mannegie blef zenuwachtig doene, dus goa ik terugge na binnen in oons eigen huus.

De volgende dag wut der rommel na buuten e'goot. Det kan der ok nog weh bie. Ik stappe der nog nie direct op of, want ut mannegie fluit noe op un aandere toon. En kiek...

Jonge koolmeesies komt veur ut eerst na buuten toe en kriegt de eerste vlieglesse. Dat ik doar getuuge van mag wenne.

## Windstille.

Lààts leup ik op zundagmönn in't bos. Dèt doe'k wéh vaker veur ut étt'n, as ut teminste niet piepestéll'n e'rengt.

Toen ik böam op de koningsbulten an kwam uut ut laste stukkje bos, zag ik doar un statse kjal stoane. Hoe ik det kon ziene?

Hij zag der bes wéh zundaags uut met ziene geruute oaverhempt, zo onder zien korte jassie. Opvallent was wéh ziene kotte bokse met van die leern riempies net onder de kniëne. Woar die noe veur dient, det week nie. Misskien um ziene majoos vaste te hoaln, want ziene blote beene maaj vaste niet ziene. Wéh draag'te un mooi huutie met een klein veertie der'op en dat maakt ut wéh of.

Má hoe der ôk uut zöt, det mutte zelf má weet'n, det maakt mie teminste niks uut, zolange ak der ma gin las van hep.

Hij stunt doar gewoon veur zig uut te kiek'n. Ok keeke niet op of daale toe'de mie heurn an kom.

“Goejndag, is ter wat of bi-j verdwaalt of zò”, vreug ik um uut fatsoen.

“Sssttt”. Det kreeg ik as antwoord terugge. Ik luusterde met um mét, má ik heurn helemoal niks en det zék um dan ôk.

Hij keek mie an en zé ting mie int hoge hollaans: “Die stilte, waar hoor je dat nog”.

“Ik heure det vaake zat, umdat ik hier woone. Má as ie doar bliej met bint, vin ik det wéh goet. Aj det zo mooi vint, dan muj hier má vaaker kom luuster’n.

Met die woord’n leut ik um alleene en leupe deur. Een stuk wieder veur ik ut bos weer in ginge, keek ik nog een keer umme. Hij stunt doar nog steeds te luusteren.

Hoop dat je van deze verzameling hebt genoten.

Op mijn website staan nog meer verhalen en gedichten in deze bundelvorm.

Kom, kijk en download op:

<https://haarle15.jouwweb.nl/verhalen-gedichtenbundels>

Tot gauw.

Met vriendelijke groet,  
Martin Wichink.